

Mora se vratiti povjerenje građana u pravosuđe



Visoki predstavnik Valentin Inzko sastao se tokom vikenda sa predsjednikom Suda BiH, Rankom Debevcem. Razgovarali su o trenutnom stanju pravosuđa u Bosni i Hercegovini i nepoštivanju vladavine prava u ovoj zemlji.

Ustav BiH jasno kaže da je BiH demokratska država u kojoj postoji vladavina prava. Međutim, to u velikoj mjeri nije slučaj u stvarnosti. „Ako Bosna i Hercegovina teži tome da bude istinski demokratska i prosperitetna zemlja, onda se vladavina prava mora značajno ojačati“, rekao je visoki predstavnik.

Sagovornici su se složili da je hitno potrebno preduzeti napore da se vrati povjerenje javnosti u pravosudne institucije Bosne i Hercegovine. “Ljudi žele živjeti u zemlji u kojoj su zaštićeni zakonom, u kojoj se zakon primjenjuje jednako na sve, u kojoj niko nije iznad zakona. Vrlo često ljudi navode nedostatak pravde u BiH kao jedan od glavnih razloga za odlazak iz zemlje“, rekao je visoki predstavnik, dodavši da je napredak moguć i da ga treba postaviti kao jedan od prioriteta za 2021. godinu.

Visoki predstavnik Inzko i g. Debevec su se složili da građani BiH imaju pravo na profesionalno, efikasno, nezavisno i odgovorno pravosuđe, koje djeluje u okruženju bez neprimjerenog političkog pritiska.